

Inatsisartut suleriaasiat § 37 naapertorlugu matumuuna Naalakkersuisunut apeqqutit imaattut saqqummiuppakka:

Qulimiguulinnik angallassinermi kiffartuussinissamut isumaqatigiissutit ukiumik ataatsimik ilaqqinneqarnerani angallassivigissallugit kiffartuussinikkut isumaqatigiissuteqafiqineqartut akitigut qanoq annertutigisumik allannguiffiqineqarpat?

1. Isumaqatigiissuteqarluni silaannakkut ilaasunik angallassiffiusuni akitigut nalimmassaa-soqarpa?
2. Silaannakkut angallassinermi kiffartuussinissamik isumaqatigiissuteqarluni nunatta karsianiit tapiissuteqarfigineqartarluni angallaviusumi akit atortinneqartut qanoq nassuiar-neqarsinnaappat?
3. Silaannakkut isumaqatigiissuteqarluni nunattalu karsianiit taperneqarluni angallassiffiusuni angallannerup ataqatigiinnginnerujussua ilisimaneqarnerluni?

(Inatsisartunut ilaasortaq Jess Svane, Siumut)

Tunngavilersuut;

Siusinnerugaatsiartukkut isumaqatigiissuteqarluni angallassiffiusuni akit assigiinnginnerujussuat ilaatigullu piffiit ilaanni allanut naleqqiullugu akit atuutsinneqartut pingasoriaatigajak tikillugu akeqartut nutaamik isumaqatigissusiornissami eqqummaariffiqineqassat neriorsuutigineqarpoq. Ajoraluartumilli ullumikkut akit nikiganerat annertunerujussuannorsimarpasittoq malunnarpoq.

Akit assigiinnginnerujussuat atuisuniit tupinnangittumik nassuiaatissarsiortuaraluarlugit nassuiaatiginiarneqartartut passiuminaapput. Assersuutigalugu ukiakkut Nuuk-miik - Ilulissaniik - Sisimiuniillu Danmarkimut uterlugulu pisiniarfiliarusuttunut neqeroorut takusartagarput amerlanerpaatigut kr. 3.900,- missarluinnaani akeqartarpoq. Malugalugu Danmarkimut uterlugulu. Diskobugt-imilu illoqarfiit mikinerit kiffartuussinissamut silaannakkut angallaffiqineqartussatut isumaqatigissuteqarfiusuni akit ullumikkorpiaq atuutsinneqartut suliffeqarfiunngikkaanni akisungaaramik akilerneqarsinnaanngillat. Asersuut ataaseq tassaavoq Qasigiannguaniik Aasiannut siumuinnaq kr. 2.200,- missarluinnaani akeqarpoq. Minutsit 20-vit ingerlaarnermi akiligassaq. Aali nunatta karsianiit tapiivigineqartoq.

Kiffartuussinissamik silaannakkut angallassivigineqartussani helikopterimut akit kisimik aningaa-satigut artukkiinngillat. Angallanneq ataqatigiinngittoq pissutaalluni Aasianni Ilulissaniluunniit

ullorpaaluit uninngasoqartarpoq imaluunniit sapaatip akunnera naanersiorneqaqqaartarluni. Tamatumani pisutaasut ilagalugit ataqatigiinngittumik pilersaarusiorsimaneq. Amerlaqaammi ullormi angerlarsimaffimmut apuussinnaaffiugaluartumi ulloq taanna Ilulissanut imaluunniit Aasiannut tikittoqartarmat ilaaffigineqarsinnaagaluartoq ullormi tassani aallareersimasoq.